

## BROP GUILTS NE PQUIAA PEDR

Bets, bzian, jdiuzh to gröse to!

<sup>1</sup> Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnalo men nroob ne zob gbaa, zigne rnaloque no me. Xquizh Jesús men ne rsilaa miech, men ne nac Dios ne rliladz ne, sac gon me gocnieñ to squi rnalo to me niina; sac mesi mine nonguiel gac, min co run me.

<sup>2</sup> Zigse zie dze, gołtsoxco lozh gunbey to zha nac Dios, zha nac Jesús men ne rnabey ne, zeena scagaa zig zie dze zunlayraa me to, zacnieñraa me to, parne peet zhgab ctsebde to. <sup>3</sup> Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. jGotsaa gwi ne ganle zha nactaa ncuaane ro, ncuaane gzee zdoo ne been me parne gbig ne lo me! <sup>4</sup> Ni psan me diidz pe nac grë ncuaane ndzon ne gneedz me lo ne. Psan me diidz, ib laa me cuee ne lo grëtaa guielyozh ne rac lo guidzliu rii, parne gac ne tib miech mbe zigne nac me.

<sup>5-7</sup> Nli laa to rnalole Dios, per parne yгаа to min co, none tsoxco to:

zaacse gołban,

gołtsoxco guieñ to zha nac Dios,

gołseed gnabey to xcuerp to,

guieete to,

tibaque gołtsoxco gołgun mine racladz Dios,

ine niowse gołbannie grë zha ne nacgrë to, gołsac zho zig

tib menlidz to;

gołleynie samiech to.

<sup>8</sup> Nana, telne tsoxco to znu gban to, dzigosi mazdraa tsoguic to mine racladz Dios, dzigosi zlu run to mine rnabey Jesús men ndzon ne rnabey ne, led loxaque runbeydse to me. <sup>9</sup> Sac zha ne tsoxcoda, rrieequia rchool lo zho ga, rrieequia rcowle guic zho ga, sac gon rsoladzd zho zha nactaa lo gre dol ne blee Dios zho.

<sup>10</sup> Bets, bzian, golguien sca, niina ne laa Dios bzooblote to, laa me bredzle to ngab to lo me, goltsoxco sca golban, parne guiabde to lo dol stib. <sup>11</sup> Niicle par gdzingaa to zaatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhial nēz zaatne ted to gdzin to ga.

<sup>12</sup> Nli nanle to gre mine rne naa nu, nli dziitsle zo to lo Xtiidz Dios, per ib none guncsoladz naa tow. <sup>13-14</sup> Laa Jesús men ndzon ne rnabey ne, blule lo naa zhile gdzin dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; <sup>15</sup> zeena niicle wbile naa lo guidzliuw, tibaque csoladz tow.

### Gonpaa Pedr Jesús

<sup>16</sup> Grese mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me <sup>17-18</sup> guic gui ne scataa pxobnen Dios ne men non, men ro nac me. Binpaa naa zēeb tsi Dios gbaa hor co, nē me: “Lēë Xpēed naa i gon, rleynie naa me, nziuu me lo naa.”

<sup>19</sup> Ga nagon rlu ne diidzli nac gre mine bzeet gre zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lēew quiazini lo to niina, zig rziini tib biini guieel, haxta riini liu zeene laa Mel Ngol rlan; ni lēë Mel Ngol co nac Jesús. <sup>20</sup> Per scagaa, racladz naa gacnan to ganle, grieelod ne lega tel

zha guiaabtaa guic miech, guiab zho sca nac miñe bzeet zha ne biadteed Xtiidz Dios, <sup>21</sup> sac gon tel zha co, bneed zho ncuane biaabtaa guic zho; sinque laa zho bnee miñe bnabey Dios psiaab Espiritu Sant guic zho.

## 2

### *Zha ne rquidie (Judas 4-13)*

<sup>1</sup>Grë zha ne biadteed Xtiidz Dios padzeela, miñe bnabey me zho miñ co bnee zho; per brieequiaque zha ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nand zho zha nactaa guielñedox ne ygaa zho, tibaque zeene guien zho laa zho nole lo caxtigw co.

<sup>2</sup>Ndal miech ne greequia tsienal grë ncuaan yozh ne gun zho, niapse por zha laa grëraa miech csilo gneenë Xtiidz Dios. <sup>3</sup>Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho miñ co, sac bzeetle Dios ganle zha nactaa lo guielñedox ne ygaa zho; <sup>4</sup>sac Diossi gon, miñe run grë zha ntseeb, csand mew scase. Golgan ganle, niicxe grë anjl ne sca been falt lo me, gondzed me zho, blegazh me zho gbaa, bnabey me bioogyu zho tib lo ncowdoo, ga niioogyu zho nieeda gal dze ne laa me gunquizh zho miñe been zho. <sup>5</sup>Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me. <sup>6</sup>Scaque len dze ne wban Lot, bdziguiend me

grë miech yozh ne bio guiedz Sodom ni guiedz Gomorr, blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac mine tsieguial zho telne csaand zho xquielntseeb zho. <sup>7-8</sup> Lotse psilaa me, sac bioxco Lot mine rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guielyozh noyun zho. <sup>9</sup> Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guielntseeb, ib tedsod zho lo guielnëdoh ne cteed me zho gal dze ne laa me gun guielwxtis.

<sup>10</sup> ;Zig nac zha ne guiaadquidie to ga, mincopaa yгаа zho! Ni lalnu gandzed Dios zho; sac gon, laa zho zienal loxaque grë guielyozh ne gdeed guxt xcuerp zho. Miech nad, miech niats nac zho, rzhidznie zho mine rnabey Dios, ni lalnu dzeb guiend lo zho rdzibdee zho grë men non ne no gbaa. <sup>11</sup> Per ni grë anjl, niicle ne zha nroob nac anjl, niicle ne rap anjl poder, per rdzin anjl lo Dios gdzibdee anjl zho. <sup>12</sup> Per zha, lo xquelyozh zho ga, haxta ncuaane riend zho zha nac, rdzibdee zho. Lëëdaa grë ma nac zho, tel ma laa ma ralse par yгаа ma nitlo ma; guiendraa xquielrien zho, ncuaane racladztaa zho run zho. Per zdzin dze ne nitlo zho, zigne rnitlodaque grë ma, <sup>13</sup> por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguieltow, rquiaalose zho miech wen nac zho zeene riaadsobnie zho to lo zhilni to. <sup>14</sup> Wnaa ne ganntaa zho, pe na gzoobladzd zho tsonie zho wnaa co, tibaque quiaayunctal zho xtol zho. Rio zho rquuil zho grë zha ne gard sodziits lo Xtiidz Dios; rienle zho zha gla zho ncuaane rquiin lo zho. Miech ndziibdeele nac zho, <sup>15</sup> sac laa zho psaanle xnëz Dios, nëz ne nitlole

zho no zho; lëe zho ruṅ xcuent Balam, xpëed meṅ ne lë Beor. Tel Balam, haxta miṅe nonguielḍraa been me par guṅ me gan dimi; <sup>16</sup> per bdziṅ tib dze zeṅe laa Dios blisqui lo me grëtaa ncuaaṅe quiayuṅ me ga. (Bnabey Dios lëëque xpurr Balam bnee, dzigoraa bien Balam psaan me xquielyozh me ga.)

<sup>17</sup> Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. ¡Laa zho nole guey zho lo guielcowdoo ne rieguial zho, zaatne gdziṅdraa dze grieë zho!

<sup>18</sup> Niats rzë xtiidz zho, per ncuaaṅe paat rquiind rnee zho. Miṅe mazdraa mban ruṅ zho, rio zho lëëque lo grë guielzyozh ne rdeed guxt xcuerp zho rquiil zho grë zha ne pense brieë lo dol, rlozh ga rbiire riab zha co lo grë dol co stib. <sup>19</sup> Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni rienḍ zho dol quianabey lo zho; sac grëse zha ne gacdraa csaan tel pe grë guielzyozh ne ruṅ zho, lëële grë ncuaaṅ co rnabey lo zho. <sup>20</sup> Tib zha ne sca brieële lo grëtaa ncuaaṅe ndzinlid ne no lo guidzliu rii (porne bliladz zho Jesús, meṅ ndzon ne rnabey, meṅ ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaaṅ zho. <sup>21</sup> Lëda ga gon, telne gocnanle zho zha racladz Dios gban zho, ni lozh ga csaṅ zho xtiidz me tib lad, gbiire zho tso zho lo grë ncuaaṅ yozh ne been zho glo. Nroobdox caxtigw ne gaṅ zha co, mazd zhi miṅe ygaa zha ne gocnanḍ zha nac xtiidz me. <sup>22</sup> Zha copaa nagon ruṅ miṅe rnee diidz ne znu rëb: “Nandraaque mëcw, ncuaaṅe bdzible ma rbiire ma row maw”; ni stib miṅe znu rnee: “Ngutzhe, rlozhle raz ma nis mbe, ni rlozh ga riegaaque ma lo nis ben.”

## 3

*¿Zha nacne gard guiaad Jesús?*

<sup>1</sup> Bets, bzian, golgan ganle lëele guits rii raca chop zixel naa. Gropse low, rso naa diidz lo to tsoxco to zaacse gban to, ine niini gac guic to. <sup>2</sup> Golsoladz ganle, zha nac grëse mine bnee grë zha ne biadteed xtiidz Dios padzeela; golsoladz zha nac grë mine rnabey Jesús, mine biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

<sup>3</sup> Racladz naa gacnan to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho gun zho grëtaa guielyozh ne gzoobladz zho; <sup>4</sup> guiab zho: “¿Pe gliladz ne nazho guiaad Jesús! Telne nli rëb me laa me guiaad, ¿yo me na? Grë xmengol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

<sup>5-6</sup> Squiaalo zho rsoladzd zho zha bnitlole guidzliu tib vuelt, ni zhagaa nitlo mine no niina. Wen wen nan zho ganle zha bnabey Dios biao guidzliu, me bnabey brieew lo nis, ni masaque lo nis now; mincocxe waa nis bnitlow glo. <sup>7</sup> Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guieñtseeb ted zho caxtigw.

<sup>8-9</sup> Zha ne rzac quiayaanladz Jesús diidz ne psan me ga, per led quiayaanladzd mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquieñtseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaañe gun ne tib milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze. <sup>10</sup> Ib laa me no guiaad, per choot nand dien pa horpaa guiaad me; laa me guiaad zig rzëëbse tib

ngbaan yu, tibaque zeene gan miech laa me ziaadle. Grëse ncuaañe no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

<sup>11</sup> Scataa nagon nitlo guidzliu rii, ni grëraa ncuaañe rdzian ne niina, jgolguien sca golban zigne racladz men ndzon ne rnabey ne, gunctaldraa to xtol to! <sup>12</sup> Tibaque golconie guic to ne ib laa me no guiaad; tibaque ndzinli golban, gollu ne quiambëz to gdzinniob dze ne sca gazbel grë ncuaañe ran ne gbaa, dze ne sca tib guiaañse grë ncuaañe niaaw. <sup>13</sup> Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guieñtseeb.

<sup>14</sup> Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleynie me to gan me mban to zigne racladz me. <sup>15</sup> Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guieñbiini ne rdeed Dios lo me rquiaa me grë guits ne zixeeñ me, zineele me lo to grë mine none naa nu. <sup>16</sup> Parga nli no mine rnee me ga, ngan guieñ ne zha naca; grë zha ne rdziinpaa racladz ctsëë Xtiidz Dios, zeene laa zho rneew, laa zho rneelew zigne racladz zho; zigne runaque zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

<sup>17</sup> Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac diidzli, csaan to nëz ne ziele to i. <sup>18</sup> Goltsoxco zig zie dze guieñraa to pa lotaa rleynie Dios to, ni guieñraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me rieguaal  
gunnon miech, zigtaa niinaw, zigtagaa grë izdoo ne zi-  
aadraaw. Sca rieguaala.

Pedr



## Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)  
copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

### Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

### © 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 9 Jun 2022

5317ca58-7555-5e4c-a420-e1e9210e2df2